

Telerau ac Amodau Cynigion ar gyfer mynediad yn 2026

Cynigir pob lle i astudio ym Mhrifysgol Aberystwyth ("y Brifysgol") ar y ddealltwriaeth eich bod, drwy dderbyn cynnig o'r fath, yn cytuno i'r Telerau a'r Amodau canlynol. Mae'r Telerau a'r Amodau hyn yn rhan o'r cytundeb cyfreithiol rwymol (y "Contract") rhyngoch chi a'r Brifysgol. Os oes gennych unrhyw gwestiynau neu os oes angen rhagor o wybodaeth arnoch, cysylltwch â'r Swyddfa Derbyn Myfyrwyr: derbyniadau@aber.ac.uk neu 01970 622021, neu drwy'r post: Swyddfa Derbyn Myfyrwyr, Prifysgol Aberystwyth, Campws Penglais, Aberystwyth, Ceredigion, SY23 3FL.

Eich Cynnig

1. Yn achos ymgeiswyr uniongyrchol, anfonir unrhyw gynnig lle ar un o'n rhaglenni astudio i'w cyfeiriad e-bost. Bydd ymgeiswyr sy'n gwneud cais drwy UCAS yn derbyn hysbysiad drwy UCAS. Mae'r e-bost sy'n cynnig lle (ac unrhyw wybodaeth ychwanegol gan UCAS, os yw'n berthnasol) yn cynrychioli ein "Cynnig". Bydd y Cynnig yn cynnwys (neu'n eich cyfeirio at) wybodaeth bwysig arall sy'n gysylltiedig â'r Cynnig, gan gynnwys:

- y rhaglen y cawsoch gynnig i astudio arni;
- manylion unrhyw amodau (academaidd neu fel arall, gan gynnwys y rhai a hysbyswyd gan UCAS), a fo'n berthnasol i'ch Cynnig;
- y lleoliad astudio, os yw eich Cynnig yn ymwneud â rhaglen a ddarperir oddi ar y safle (h.y. nid yn Aberystwyth);
- manylion y ffioedd dysgu sy'n daladwy.

2. Dim ond pan fyddwch yn bodloni union amodau eich Cynnig y bydd eich lle ar y rhaglen yn cael ei warantu, oni nodir yn wahanol mewn gohebiaeth swyddogol gan y Brifysgol.

3. Os ydych yn cael cynnig ar gyfer rhaglen arall, nid oes rheidrwydd arnoch i'w dderbyn.

4. Ystyrir unrhyw geisiadau i newid eich rhaglen astudio, boed hynny yn ystod y broses ymgeisio neu ar ôl cyrraedd y Brifysgol, ar yr amodau bod digon o leoedd ar gael a'ch bod yn bodloni'r gofynion mynediad ar gyfer y rhaglen honno.

5. Bydd gofyn i chi ail gadarnhau eich bod yn cytuno â'r Telerau a'r Amodau hyn pan fyddwch yn cofrestru fel myfyriwr.

Cywirdeb yr wybodaeth

6. Trwy gyflwyno cais i'r Brifysgol, rydych yn cadarnhau bod yr holl wybodaeth a roddwyd yn wir, yn gyflawn ac yn gywir, hyd eithaf eich gwybodaeth.

7. Gall rhoi gwybodaeth anghywir, anghyflawn, ffug neu gamarweiniol arwain at wrthod eich cais neu ei dynnu'n ôl, a bydd eich Contract gyda'r Brifysgol yn cael ei derfynu. Efallai y byddwn hefyd yn gwrthod ystyried unrhyw geisiadau a wneir gennych yn y dyfodol.

8. Rhaid i chi ddarparu tystiolaeth foddhaol o'ch cymwysterau ac unrhyw amodau eraill a nodir yn eich Cynnig pan ofynnir i chi wneud hynny. Os nad ydych yn bodloni'r amodau hyn, neu os daw adeg pan na fyddwch yn eu bodloni mwyach, neu os na ddarparwch dystiolaeth resymol o'u bodloni, mae'n bosib y bydd y Contract yn cael ei derfynu.

9. Mae'r Brifysgol yn cadw'r hawl i gywiro unrhyw wallau a wnaed mewn gohebiaeth am benderfyniadau a chynigion.

Eich Statws Ffioedd

10. Wrth benderfynu ar eich statws ffioedd, mae'r Brifysgol yn dilyn y rheolau a nodir yn rheoliadau llywodraeth Cymru, gan gynnwys Rheoliadau Addysg (Ffioedd a Dyfarniadau) (Cymru) 2007 (fel y'u diwygiwyd), Rheoliadau Addysg Uwch (Cyrsiau Cymhwysol, Personau Cymhwysol a Darpariaeth Atodol) (Cymru) 2015 (fel y'u diwygiwyd) ac unrhyw reoliadau eraill a nodir o bryd i'w gilydd.

11. Bydd eich statws ffioedd yn cael ei bennu naill ai yn ffioedd 'Cartref' neu 'Ryngwladol'.

12. Fel arfer, bydd eich statws ffioedd yn aros yr un fath trwy gydol eich astudiaethau. Fodd bynnag, os ydych chi'n ennill statws mewnfudo 'sefydlog' ran o'r ffordd trwy'ch rhaglen, efallai y bydd eich statws ffioedd yn cael ei ddiweddarau o 'Rhyngwladol' i 'Cartref'. Os oes angen ailasesu eich statws ffioedd a'i newid, bydd unrhyw newidiadau i'r ffioedd yn dod i rym o ddechrau'r flwyddyn academiaidd nesaf. Bydd ailasesiadau yn cael eu cynnal yn unol â'r rheoliadau perthnasol sydd mewn grym ar y pryd.

13. Mae gennych yr hawl i apelio yn erbyn y statws ffioedd a benodwyd i chi. Gellir gwneud apeliadau naill ai ar y sail nad yw penderfyniad y Brifysgol yn cydymffurfio â'r rheoliadau perthnasol, neu os oes gwybodaeth newydd wedi dod i'r amlwg a allai effeithio'n rhesymol ar y penderfyniad. I apelio, dylech gysylltu â'r Swyddfa Derbyn Myfyrwyr, drwy e-bost derbyn@aber.ac.uk neu drwy'r post: Prifysgol Aberystwyth, Adeilad Cledwyn, Campws Penglais, Aberystwyth, SY23 3DD. Bydd y Swyddfa Derbyn Myfyrwyr yn cysylltu â chi o fewn pum diwrnod gwaith ar ôl derbyn unrhyw ohebiaeth. Os nad ydych yn fodlon â'r ymateb cyntaf yma, gallwch fynd ar drywydd y mater drwy ein proses Cwynion ac Apeliadau, sydd ar gael yn: [Polisi Cwynion ac Apeliadau ar gyfer Ymholwyr ac Ymgeiswyr : Astudio Gyda Ni , Prifysgol Aberystwyth](#)

Eich Ffioedd Dysgu

14. Mae manylion ein Ffioedd Dysgu ar gael ar ein gwefan: <https://www.aber.ac.uk/cy/study-with-us/fees/>

15. Noder, bydd ffioedd Dysgu myfyrwyr israddedig sy'n talu ffioedd cartref yn seiliedig fel arfer ar y ffi uchaf a ganiateir gan Lywodraeth Cymru. Gall ffioedd Dysgu ar gyfer y myfyrwyr hynny fod yn destun cynnydd blynyddol, fel y nodir yn fanylach ym mharagraffau 20-23 isod. Bydd unrhyw newidiadau i'r Ffioedd Dysgu yn cael eu cyfleu'n glir ac yn agored cyn dechrau'r flwyddyn academiaidd y maent yn berthnasol iddi.

16. Os ydych yn hunan-ariannu, mae gwybodaeth am sut i dalu eich Ffioedd Dysgu i'w gweld ar ein gwefan: <https://www.aber.ac.uk/cy/study-with-us/fees/student-fees/>

Blaendaliadau ffioedd dysgu

17. Os bydd angen i chi dalu blaendal Ffioedd Dysgu er mwyn sicrhau eich lle, bydd yr wybodaeth honno'n cael ei chynnwys yn eich Cynnig.

18. Mae blaendaliadau Ffioedd Dysgu yn ddarostyngedig i'r telerau a'r amodau a amlinellir yn ein Polisi Ad-daliad Blaendaliadau Rhyngwladol.

Newidiadau i'ch Ffioedd Dysgu

19. Mae'r Brifysgol yn cadw'r hawl i gynyddu Ffioedd Dysgu yn unol â pharagraffau 20-26 (cynwysedig).

20. Statws Ffioedd 'Cartref' Israddedig - Mae ffioedd dysgu 'Cartref' israddedig yn cael eu rheoleiddio gan Lywodraeth Cymru o dan ddeddfwriaeth. Mae'r Brifysgol yn cadw'r hawl i gynyddu Ffioedd Dysgu ym mhob blwyddyn o'ch rhaglen lle mae newid yn swm y ffioedd y mae gan y Brifysgol hawl gyfreithiol i'w codi am eich astudiaethau. Bydd cynnydd o'r fath yn gyfyngedig i'r uchafswm a bennir gan ddeddfwriaeth ac fel arfer maent yn gysylltiedig â chwyddiant. Polisi'r Brifysgol yw codi uchafswm y ffioedd dysgu rheoledig i adlewyrchu costau cynyddol y ddarpariaeth ac i gynnal profiad myfyrwyr o ansawdd uchel. Er enghraifft, os mai £9,535 yw eich Ffioedd Dysgu ym mlwyddyn un, a'r cynnydd sy'n gysylltiedig â chwyddiant a ganiateir gan Lywodraeth Cymru yw 3% y flwyddyn, byddai eich Ffioedd Dysgu yn cynyddu i £9,821 ym mlwyddyn dau a £10,116 ym mlwyddyn tri gan roi cyfanswm o £29,472 ar gyfer rhaglen israddedig tair blynedd nodweddiadol. Bydd y cynnydd hwn yn berthnasol i'r ffioedd cyfrannol a godir am y Flwyddyn Dramor a'r Flwyddyn mewn Gwaith. Os ydym yn bwriadu arfer yr hawl i gynyddu Ffioedd Dysgu, byddwn yn rhoi gwybod i chi cyn gynted â phosibl ac ym mhob achos erbyn diwedd [Mehefin] yn y flwyddyn academaidd cyn yr un yr ydym yn bwriadu cynyddu'r Ffioedd Dysgu ynddi. Os ydych yn anfodlon â'r cynnydd arfaethedig, mae gennych hawl i derfynu eich Contract â'r Brifysgol.

21. Statws Ffioedd 'Rhyngwladol' Israddedig - nid yw Ffioedd Dysgu Israddedig a godir ar y gyfradd ffioedd 'Rhyngwladol' yn cael eu rheoleiddio gan Lywodraeth Cymru ac ni fyddant yn cynyddu'n flynyddol ar sail chwyddiant yn ystod eich astudiaethau. Mae hyn yn golygu y bydd y Ffi 'Ryngwladol' a godir ym mlwyddyn un yn aros ar yr un lefel trwy gydol eich rhaglen astudio.

22. Ffioedd 'Cartref' Ymchwil Ôl-raddedig (ac eithrio DProf) - Mae ffioedd dysgu i fyfyrwyr cartref ar raglenni ymchwil ôl-raddedig yn gysylltiedig â chyfraddau ffioedd Cyngor Ymchwil y DU a byddant yn destun cynnydd blynyddol yn ystod eich astudiaethau oherwydd newidiadau yn y cyfraddau presennol a osodwyd gan Gyngor Ymchwil y DU. Bydd y Brifysgol yn rhoi gwybod i chi am unrhyw gynnydd yn y ffioedd cyn gynted â phosibl ac ym mhob achos erbyn diwedd [Mehefin] yn y flwyddyn academaidd cyn yr un y bydd y ffioedd dysgu'n cynyddu ynddi. Os ydych yn anfodlon â'r cynnydd arfaethedig, mae gennych hawl i derfynu eich Contract â'r Brifysgol.

23. Ffioedd 'Rhyngwladol' Ymchwil Ôl-raddedig (ac eithrio DProf) – Bydd ffioedd dysgu i fyfyrwyr rhyngwladol ar raglenni ymchwil ôl-raddedig yn destun cynnydd blynyddol sy'n gysylltiedig â chwyddiant yn ystod eich astudiaethau i adlewyrchu costau cynyddol o gyflawni ac i gynnal profiad myfyrwyr o ansawdd uchel. Mae cynnydd mewn ffioedd fel arfer yn gysylltiedig â'r Mynegai Prisiau Defnyddwyr (Mynegai Chwyddiant Prisiau Defnyddwyr sy'n eithrio costau tai perchennog preswyl) yn *ogystal â 3%* [ac wedi'i gyfyngu i 8%]. Mae hyn yn golygu y dylech gyllidebu ar gyfer cynnydd o hyd at [8]% bob blwyddyn am bob blwyddyn arall o astudiaethau. Os ydym yn bwriadu arfer yr hawl i gynyddu Ffioedd Dysgu, byddwn yn rhoi gwybod i chi cyn gynted â phosibl ac ym mhob achos erbyn diwedd [Mehefin] yn y flwyddyn academaidd cyn yr un yr ydym yn bwriadu cynyddu'r Ffioedd Dysgu ynddi. Os ydych yn anfodlon â'r cynnydd arfaethedig, mae gennych hawl i derfynu eich Contract â'r Brifysgol.

24. Ffioedd DProf Ôl-raddedig – Ni fydd Ffioedd Dysgu a godir am raglenni ymchwil DProf Ôl-raddedig yn cynyddu'n flynyddol ar sail chwyddiant yn ystod eich astudiaethau. Mae hyn yn golygu y bydd y Ffioedd Dysgu a godir yn eich blwyddyn gyntaf yn aros yr un fath ar gyfer pob blwyddyn ddilynol o'ch rhaglen astudio (lle bo hynny'n berthnasol).

25. Ffioedd Graddau Meistr a Addysgir Ôl-raddedig – Ni fydd Ffioedd Dysgu a godir am raglenni Meistr a Addysgir Ôl-raddedig yn cynyddu'n flynyddol ar sail chwyddiant yn ystod eich astudiaethau. Mae hyn yn golygu y bydd y Ffioedd Dysgu a godir yn eich blwyddyn gyntaf yn aros yr un fath ar gyfer pob blwyddyn ddilynol o'ch rhaglen astudio (lle bo hynny'n berthnasol).

26. Ffioedd Dysgu o Bell - Bydd ffioedd dysgu ar gyfer rhaglenni ymchwil ôl-raddedig yn destun cynnydd blynyddol sy'n gysylltiedig â chwyddiant yn ystod eich astudiaethau i adlewyrchu costau cynyddol o gyflawni ac i gynnal profiad myfyrwyr o ansawdd uchel. Mae cynnydd mewn ffioedd fel arfer yn gysylltiedig â'r Mynegai Prisiau Defnyddwyr (Mynegai Chwyddiant Prisiau Defnyddwyr sy'n eithrio costau tai perchennog preswyl) yn *ogystal â 3%* [ac wedi'i gyfyngu i 8%]. Mae hyn yn golygu y dylech gyllidebu ar gyfer cynnydd o hyd at [8]% bob blwyddyn am bob blwyddyn arall o astudiaethau. Os ydym yn bwriadu arfer yr hawl i gynyddu Ffioedd Dysgu, byddwn yn rhoi gwybod i chi cyn gynted â phosibl ac ym mhob achos erbyn diwedd [Mehefin] yn y flwyddyn academaidd cyn yr un yr ydym yn bwriadu cynyddu'r Ffioedd Dysgu ynddi. Os ydych yn anfodlon â'r cynnydd arfaethedig, mae gennych hawl i derfynu eich Contract â'r Brifysgol.

Talu ffioedd

27. Sut i dalu. Rhaid talu'r Ffioedd Dysgu ar gyfer pob blwyddyn astudio wrth gofrestru ar ddechrau'r flwyddyn academaidd. Rhaid talu'r ffioedd naill ai'n llawn ar yr adeg honno, neu drefnu cynllun talu sy'n cynnwys 3 rhandaliad gyda cherdyn banc.

28. Os oes gennych unrhyw gwestiynau am ffioedd neu os oes angen rhagor o fanylion arnoch am dalu (gan gynnwys os ydych yn cael trafferthion wrth dalu eich ffioedd), cysylltwch â'r Tîm Gweithrediadau Cyllid: ffioedd@aber.ac.uk

29. Os nad yw myfyriwr yn cwblhau taliad yn unol â'r Telerau a'r Amodau hyn, bydd Polisi Casglu Dyledion Teg y Brifysgol yn berthnasol. Mewn amgylchiadau o'r fath, mae'r Brifysgol yn cadw'r hawl i gymryd pob cam rhesymol i adennill ffioedd sy'n weddill. Os oes gennych Ffioedd Dysgu heb eu talu, mae'r Brifysgol yn cadw'r hawl i ganslo'r Contract a therfynu cofrestrriad y myfyriwr heb ad-daliad.

30. Noder, os yw eich Ffioedd Dysgu yn cael eu talu ar eich rhan gan drydydd parti neu noddwr, chi fydd yn gyfrifol am dalu'r Ffioedd Dysgu sy'n ddyledus os nad yw'r trydydd parti neu'r noddwr hwnnw yn talu pan fydd yn ddyledus.

Ffioedd a Thaliadau Ychwanegol

31. Mae'r ddarpariaeth academaidd yn y Brifysgol yn cynnwys rhai elfennau astudio sy'n cael eu cynnal yn rhywle arall heblaw Aberystwyth. Gall y gweithgareddau hyn gynnwys cyrsiau maes mewn pynciau biolegol, daearyddol ac amgylcheddol, yn ogystal ag ymweliadau â theatrau, orielau ac amgueddfeydd mewn pynciau sy'n seiliedig ar y dyniaethau (fel enghreifftiau eglurhaol).

32. Nid yw'r costau ychwanegol sy'n gysylltiedig â'r cyfleoedd hyn wedi'u cynnwys yn y Ffioedd Dysgu blynyddol, felly dylech neilltuo arian ar gyfer y digwyddiadau hyn yn unol â hynny.

33. Bydd unrhyw gostau ychwanegol gorfodol neu ddewisol sy'n gysylltiedig â'ch rhaglen benodol yn cael eu nodi yn eich Cynnig ac ar [dudalennau rhaglen] ein gwefan.

34. Bydd y rhaglenni astudio'n amrywio o ran eu cost, eu lleoliad a'u hyd. Gellir dod o hyd i gostau enghreifftiol ar gyfer pob gweithgaredd ar y tudalennau Ffioedd a Chostau Ychwanegol ar ein gwefan.

35. Trwy dderbyn eich Cynnig, rydych yn cytuno i gydymffurfio â darpariaethau'r Siarter, Ystatudau ac Ordinhadau a'r Rheoliadau, a rheolau a rheoliadau eraill fel y bo'r Brifysgol yn eu sefydlu ar gyfer ei myfyrwyr o bryd i'w gilydd (a ddiffinnir gyda'i gilydd fel y "Rheoliadau").

36. Mae darpariaethau a disgwyliadau allweddol y Rheoliadau a'r polisiau y dylech fod yn ymwybodol ohonynt yn cynnwys y rhai a amlinellir yn y Llawlyfr Ansawdd Academaidd a'r Rheolau a'r Rheoliadau cysylltiedig.

37. Os na chedwir at y rheolau hyn efallai y rhoddir proses ddisgyblu ar waith a gosod cosbau academaidd a/neu ddiarddel yn unol â'r Drefn Disgyblu Myfyrwyr a gynhwysir ynddynt. Gall y rhain gynnwys, ymhlith eraill:

- Ymroddiad Myfyrwyr a Chynnydd Academaidd - os nad ydych yn cyrraedd y disgwyliadau hyn efallai y cewch eich atal rhag symud ymlaen ar eich rhaglen.
- Ymddygiad Myfyrwyr - gallai torri'r rheolau hyn arwain at ymchwiliad mewnol annibynnol a gosod sancsiynau, a allai gynnwys diarddel.
- Ymddygiad Academaidd Annerbyniol - gall torri'r rheolau hyn arwain at broses ddisgyblu, cosbau academaidd a/neu ddiarddel.
- Talu Ffioedd Dysgu – yn unol â'n Polisi Casglu Dyledion Teg i Fyfyrwyr, os nad ydych yn talu'r arian sy'n ddyledus gennych i'r Brifysgol, rydym yn cadw'r hawl i dynnu'ch caniatâd i ddefnyddio'n cyfleusterau a/neu wasanaethau yn ôl lle bo'n angenrheidiol ac yn gymesur.

- Cydraddoldeb ac Amrywioldeb - mae'r Brifysgol wedi ymrwymo i feithrin amgylchedd heb unrhyw wahaniaethu a hyrwyddo diwylliant o gynwysoldeb, yn seiliedig ar urddas, cwrteisi a pharch. Mae'n ofynnol i bob myfyriwr ac aelod o staff gydymffurfio â'n safonau Cydraddoldeb ac Amrywioldeb, sydd wedi'u seilio ar Ddeddf Cydraddoldeb 2010. Gall unrhyw ymddygiad sy'n mynd yn groes i'r safonau hyn, boed wrth ymweld â'r Brifysgol, ar ôl cofrestru, neu wrth gynrychioli'r Brifysgol, arwain at derfynu ein contract â chi.
- Addasrwydd i Ymarfer - (gall gynnwys gwiriad y Gwasanaeth Datgelu a Gwahardd (DBS)) mae hyn yn berthnasol i fyfyrwyr sydd wedi cofrestru ar raglenni sy'n arwain at gymhwyster proffesiynol, y rhai sydd wedi'u cofrestru gyda chorff rheoleiddio statudol, neu'r rhai sydd angen mynd ar gyfnod lleoliad gwaith. Mae enghreifftiau'n cynnwys rhai cynlluniau Addysg, Addysg Gofal Iechyd/Nyrsio, a Gwyddor Felfeddygol/Nyrsio Milfeddygol
- Datgelu Euogfarnau Troseddol perthnasol – fel y'u diffinnir yn ein Polisi Euogfarnau Troseddol, mae rhwymedigaeth arnoch o hysbysu'r Brifysgol ar unwaith os oes gennych neu os ydych yn cael euogfarnau troseddol heb eu disbyddu am droseddau perthnasol. Am fwy o wybodaeth, cysylltwch â'r Swyddfa Derbyn Myfyrwyr drwy'r cyfeiriad e-bost cyfrinachol: admitdisclose@aber.ac.uk. Unwaith y byddwch yn fyfyrwr cofrestredig, dylid gwneud unrhyw ddatganiad i arconf@aber.ac.uk. Os na datgelir y wybodaeth hon fe ellid ystyried bod hynny'n torri Gweithdrefnau Disgyblaeth y Brifysgol a gellid gosod cosbau yn unol â hynny. Mae euogfarnau troseddol heb eu disbyddu perthnasol yn cynnwys:
 - unrhyw fath o drais gan gynnwys (ond heb fod yn gyfyngedig i) ymddygiad bygythiol, troseddau yn ymwneud â'r bwriad i niweidio neu droseddau a arweiniodd at niwed corfforol gwirioneddol.
 - troseddau a restrir yn y Ddeddf Troseddau Rhywiol 2003;
 - cyflenwi cyffuriau neu sylweddau rheoledig yn anghyfreithlon lle mae'r euogfarn yn ymwneud â delio cyffuriau'n fasnachol neu fasnachu pobl;
 - troseddau yn ymwneud ag arfau tanio;
 - troseddau yn ymwneud â llosgi bwriadol; a
 - throseddau a restrir yn y Ddeddf Terfysgaeth 2006.

38. Mae'r Brifysgol yn cadw'r hawl i ychwanegu, dileu neu wneud newidiadau rhesymol i'r Rheoliadau os, ym marn y Brifysgol, y bydd hyn yn cynorthwyo i ddarparu addysg yn briodol. Gwneir newidiadau fel arfer am un o'r rhesymau canlynol:

- (a) i adolygu a diweddarau'r Rheoliadau i sicrhau eu bod yn addas i'r diben;
- (b) i ddiogelu safonau academiaidd, er enghraifft, mewn ymateb i adborth arholwyr allanol;

- (c) i adlewyrchu newidiadau yn yr amgylchedd allanol, gan gynnwys newidiadau cyfreithiol neu reoleiddiol, newidiadau i drefniadau cyllid neu ariannol neu newidiadau i bolisi, gofynion neu ganllawiau'r llywodraeth;
- (d) i ymgorffori canllawiau neu arfer gorau'r sector;
- (e) i ymgorffori adborth gan fyfyrwyr; a/neu
- (f) i gynorthwyo â gwella eglurder neu gysondeb dulliau gweithredu.

39. Bydd unrhyw newidiadau fel rheol yn dod i rym ar ddechrau'r flwyddyn academaidd nesaf, fodd bynnag, mae'n bosib y cyflwynir newid yn ystod y flwyddyn academaidd os yw'r Brifysgol o'r farn resymol bod hyn er budd y myfyrwyr, neu os yw'n ofynnol yn ôl y gyfraith neu amgylchiadau eithriadol eraill. Bydd y Brifysgol yn cymryd pob cam rhesymol i osgoi tarfu'n ormodol ar fyfyrwyr lle bo hynny'n bosibl, er enghraifft drwy roi rhybudd rhesymol o newidiadau i Reoliadau cyn iddynt ddod i rym, neu drwy gyflwyno'r newidiadau yn raddol os yw hynny'n briodol. Bydd y Rheoliadau wedi'u diweddarau ar gael ar wefan y Brifysgol ac mae'n bosibl y cânt eu cyhoeddi drwy ddulliau eraill i sicrhau bod myfyrwyr yn ymwybodol o unrhyw newidiadau.

Yr Hawl i Astudio yn y Deyrnas Unedig

40. Chi sy'n gyfrifol am sicrhau eich bod yn gallu dangos eich hawl i astudio yn y Deyrnas Unedig. Fel arfer, bydd angen fisa myfyriwr ar ymgeiswyr o'r tu allan i'r DU cyn y gallant gofrestru ac astudio ar raglen yn y Brifysgol. Eich cyfrifoldeb chi yw sicrhau bod y caniatâd fisa perthnasol gennych a'ch bod yn cydymffurfio â thelerau'r fisa hwnnw.

41. Mae Prifysgol Aberystwyth yn 'noddwr' cofrestredig o dan System Fewnfudo Llywodraeth y DU sy'n Seiliedig ar Bwyntiau. Mae hyn yn ein galluogi i recriwtio a noddi myfyrwyr sy'n ddinasyddion gwledydd y tu allan i'r Deyrnas Unedig. Mae'r Brifysgol yn cadw'r hawl i dynnu nawdd fisa myfyrwyr yn ôl a dod â'r Contract hwn i ben yn achos unrhyw fyfyrwr nad yw'n cydymffurfio â rheolau a rheoliadau fisa fel y'u diffinnir gan y Swyddfa Gartref / UKVI.

42. Os oes gennych unrhyw gwestiynau neu os oes angen unrhyw fanylion pellach arnoch am fisâu neu fewnfudo, cysylltwch â'r Swyddfa Cydymffurfio yn: compliance@aber.ac.uk.

Amrywiadau i'r Rhaglen a'r Gwasanaethau

43. Bydd y Brifysgol yn gwneud pob ymdrech resymol i ddarparu addysgu a gwasanaethau addysgol cysylltiedig a gwasanaethau ac adnoddau eraill ar gyfer y rhaglen yn unol â'r disgrifiad a roddir ar gyfer y flwyddyn academaidd y byddwch yn dechrau'r rhaglen. Fodd bynnag, bydd gan y Brifysgol hawl i wneud newidiadau rhesymol i'ch rhaglen neu i wasanaethau ac addysgol a gwasanaethau eraill cysylltiedig os bydd hynny'n galluogi'r Brifysgol i ddarparu profiad addysgol o ansawdd gwell i fyfyrwyr sydd wedi'u cofrestru ar y rhaglen. Gall rhesymau dros newidiadau o'r fath gynnwys:

- adlewyrchu newidiadau yn y gyfraith a/neu ofynion proffesiynol, statudol, neu'r corff rheoleiddio a/neu reoliadau'r sector
- ymgorffori canllawiau neu arfer gorau'r sector;
- adlewyrchu datblygiadau pwysig mewn addysgu academaidd, ymchwil a/neu safonau proffesiynol neu ofynion i sicrhau bod cynnwys ein rhaglen a'i darpariaeth yn gyfredol ac yn berthnasol;
- ymateb i adborth myfyrwyr, adborth arholwyr allanol neu adolygiad mewnol ar y rhaglen;
- ymwneud â newidiadau anochel yn ein staff academaidd a/neu staff cynorthwyol, er enghraifft pan fo staff allweddol wedi cymryd absenoldeb estynedig neu wedi gadael y Brifysgol;
- adlewyrchu gostyngiad yn y nifer o fyfyrwyr sydd wedi cofrestru, nawr neu yn y dyfodol;
- adlewyrchu sefyllfa lle nad yw bellach yn ymarferol yn ariannol i gynnal modiwl neu raglen;
- adlewyrchu unrhyw newidiadau i strwythur y flwyddyn academaidd, i'n hamserlen, ein cyfleusterau neu'r lleoliad a/neu'r dull o ddarparu rhaglenni;
- cynorthwyo â gwella eglurder neu gysondeb dulliau gweithredu.

44. Gall newidiadau o'r fath fod i:

- gynnwys a maes llafur y rhaglen;
- amserlen, lleoliad a nifer y dosbarthiadau;
- strwythur a/neu amseriad y flwyddyn academaidd;
- y dull o gyflwyno rhaglenni, gwasanaethau ac adnoddau; a/neu
- y broses arholi ac asesu.

45. Bydd unrhyw newidiadau fel arfer yn dod i rym ar ddechrau'r flwyddyn academaidd nesaf, er bod y Brifysgol yn cadw'r hawl i weithredu newidiadau ar adegau eraill os bernir bod hynny'n rhesymol briodol. Wrth wneud unrhyw newidiadau o'r fath, bydd y Brifysgol yn ceisio gwneud cyn lleied â phosibl o newidiadau i gyflawni'r ansawdd gofynnol o ran profiad a bydd yn hysbysu ac yn ymgynghori â myfyrwyr yr effeithir arnynt ymlaen llaw am unrhyw newidiadau sydd eu hangen. Os yw'r Brifysgol yn newid eich rhaglen ac nad ydych yn fodlon â'r newidiadau, byddwch yn cael cynnig cyfle i dynnu'n ôl o'r rhaglen, symud i raglen arall neu, os oes angen, cynigir cymorth rhesymol i drosglwyddo i ddarparwr arall.

46. Bydd unrhyw newidiadau yn cael eu dangos ar wefan y Brifysgol ac fe ddefnyddir dulliau eraill i roi gwybod i fyfyrwyr amdanynt.

47. Mae'r prospectws printiedig yn gywir ar adeg ei argraffu. Bydd unrhyw newidiadau i'r cyrsiau rydym yn cynnig, neu i gynnwys ein cyrsiau, yn cael eu gwneud i'n tudalennau perthnasol o'n gwefan. Cyngoror ymgeiswyr yn gryf i edrych ar yr adrannau perthnasol o'n gwefan cyn gwneud cais a derbyn Cynnig.

48. Mewn amgylchiadau eithriadol, efallai y bydd achosion lle mae'r Brifysgol o'r farn ei bod yn angenrheidiol i beidio â darparu rhaglen, neu uno neu gyfuno rhaglen â rhaglenni astudio eraill os yw'r niferoedd a gafodd eu recriwtio i'r rhaglen mor isel fel nad yw'n bosibl cyflwyno addysg o safon briodol. Os bydd y Brifysgol yn penderfynu cymryd unrhyw gamau o'r fath cyn i'r rhaglen ddechrau, bydd yn rhoi gwybod i chi ymlaen llaw ac yn gwneud ymdrechion rhesymol i'ch cynorthwyo i drosglwyddo i raglen arall briodol yn y Brifysgol neu at ddarparwr arall. Yn yr amgylchiadau hyn, bydd gennych hawl i ganslo'r Contract hwn gan ddarparu rhybudd ysgrifenedig i'r Brifysgol a bydd gennych hawl i gael ad-daliad o unrhyw flaendal/ffioedd rydych wedi'u talu. Ar gyfer myfyrwyr nad ydynt wedi dechrau eu hastudiaethau eto, byddwn yn cymryd yr holl gamau angenrheidiol (gan gynnwys, os yw'n berthnasol, fynd trwy system UCAS) i'ch galluogi i ddewis rhaglen arall (naill ai yn y Brifysgol neu mewn sefydliad arall).

49. Mae'n amod eich Contract eich bod yn cofrestru ar ddechrau eich cwrs, ac ar ddechrau pob blwyddyn academiaidd wedi hynny trwy gydol eich cwrs. Cewch wybod am y broses gofrestru cyn dechrau pob blwyddyn academiaidd. Os na fyddwch yn cofrestru erbyn y dyddiad cau yna bydd eich hawl i ddefnyddio cyfleusterau'r Brifysgol yn cael ei hatal.

Amgylchiadau y tu hwnt i'n rheolaeth

50. O bryd i'w gilydd, bydd amgylchiadau y tu hwnt i reolaeth resymol y Brifysgol yn codi, na ellid fod wedi'u hatal hyd yn oed gyda gofal rhesymol ("Amgylchiadau y tu hwn i'n Rheolaeth") sy'n golygu ein bod yn cael ein hatal, ein rhwystro neu ein gohirio rhag darparu, neu na allwn ddarparu'r rhaglen, y gwasanaethau addysgol a'r adnoddau a'r gwasanaethau eraill a ddisgrifir. Mewn achosion o'r fath, bydd y Brifysgol yn eich hysbysu yn unol â hynny ac yn cymryd pob cam rhesymol i leihau'r effaith ar brofiad dysgu'r myfyriwr.

51. Os bydd amgylchiadau o'r fath yn golygu bod angen addasu neu gau rhaglen, byddwn yn cynnig cyfle i chi drosglwyddo i raglen arall o fewn y Brifysgol, neu dynnu'n ôl. Os byddwch yn dewis tynnu'n ôl, byddwn yn rhoi cymorth rhesymol i'ch cynorthwyo i sicrhau lle mewn prifysgol arall.

52. Os nad ydych yn fodlon â'r camau a gymerwyd i liniaru amgylchiadau o'r fath sy'n tarfu arnoch, gallwch derfynu eich Contract gyda'r Brifysgol a/neu wneud cwyn ffurfiol. Fodd bynnag, os bydd amgylchiadau'n codi sy'n rhwystro'r Brifysgol rhag cymryd camau i darfu cyn lleied â phosib ar fyfyrwyr, ni fyddwn ni na chithau yn atebol am dorri'r Contract hwn, nac am beidio â chydymffurfio â'i thelerau. Mae hyn yn cynnwys darparu dysgu neu wasanaethau pellach, talu ffioedd ychwanegol, ad-daliadau am ffioedd a dalwyd, neu unrhyw fath arall o golled neu niwed.

53. Mae enghreifftiau o Amgylchiadau y tu hwnt i'n Rheolaeth yn cynnwys (ymhlith pethau eraill):

- gweithredoedd Duw, llifogydd, daeargrynfeydd, stormydd gwynt neu drychinebau naturiol eraill neu dywydd garw;
- pandemigau, epidemigau neu glefydau heintus, a bygythiadau i'r iechyd cyhoeddus;
- tanau, ffrwydradau, neu ddifrod damweiniol;
- terfysgaeth;
- aflonyddwch gwleidyddol neu sifil;
- adeiladau'n dymchwel, peiriannau'n methu, cyfrifiaduron yn torri, neu gerbydau'n pallu;
- difrod, ymyrraeth neu ddim mynediad i adeiladau, cyfleusterau neu offer;
- anghydfodau gan drydydd parti yn ymwneud â llafur, gan gynnwys streiciau a gweithredu diwydiannol gan drydydd parti;
- tarfu ar wasanaethau cyfleustodau neu fethu â'u darparu, gan gynnwys, ymhlith pethau eraill, trydan, nwy neu ddŵr;
- deddfau, gorchmynion, deddfwriaeth, rheoliadau neu gyfyngiadau a osodir gan unrhyw lywodraeth neu awdurdod lleol;
- newidiadau cyfreithiol neu reoleiddiol neu ofynion a nodir gan gyrff achredu neu reoleiddwyr proffesiynol;
- absenoldebau annisgwyl neu aelodau allweddol o staff yn ymadael, lle nad yw'n bosib, yn rhesymol, ddod o hyd i aelod newydd o staff sy'n addas ac sydd â'r arbenigedd angenrheidiol;
- dim digon wedi cofrestru ar raglen;
- sancsiynau a osodwyd gan unrhyw wlad.

Myfyrwyr sy'n astudio rhaglenni a gyflenwir gan Bartner-Ddarparwyr

54. Mae'r adran hon wedi ei neilltuo i achosion myfyrwyr sydd wedi cofrestru ar raglen astudio Prifysgol Aberystwyth a ddarperir gan Bartner-Ddarparwr, y cyfeirir atynt o hyn ymlaen fel "Partner-Ddarparwr", megis o dan gytundeb masnachfaint neu raglenni ar y cyd, deuol neu ddwbl. Os nad y Brifysgol sy'n darparu'r rhaglen, bydd eich Cynnig yn nodi'n glir pwy yw'r Partner-Ddarparwr.

55. Cytundeb Partner-Ddarparwr: Yn ogystal â'ch Contract gyda'r Brifysgol, byddwch hefyd yn creu cytundeb gyda'r Partner-Ddarparwr, y cyfeirir ato o hyn ymlaen fel y "Cytundeb Partner-Ddarparwr". Mae'r Cytundeb Partner-Ddarparwr yn rhoi caniatâd i chi fynychu adeiladau'r Partner-Ddarparwr i ddilyn eich rhaglen astudio. Cytundeb rhyngoch chi a'r Partner-Ddarparwr yn unig yw hwn, ac ni ellir ei orfodi gan y Brifysgol nac yn erbyn y Brifysgol. Bydd y Cytundeb Partner-Ddarparwr yn rheoli'ch perthynas â'r Partner-Ddarparwr ac yn manylu ar ein disgwyliadau ohonoch wrth ichi fynychu'r safle er mwyn astudio. Mae'n amod o'ch Contract gyda'r Brifysgol eich bod yn cytuno â thelerau'r Cytundeb Partner Ddarparwr ac fe fydd yn cael ei derfynu yn yr amgylchiadau canlynol:

- Os nad ydych yn derbyn telerau'r Cytundeb Partner-Ddarparwr cyn cofrestru neu ailgofrestru mewn unrhyw flwyddyn academiaidd;
- Os ydych yn derbyn y telerau ond ar ôl hynny'n terfynu eich Cytundeb Partner-Ddarparwr am ba reswm bynnag; neu

- Os yw'r Partner-Ddarparwr yn terfynu'r Cytundeb Partner-Ddarparwr yn gyfreithiol am ba reswm bynnag ac nad yw'n ymarferol bosib ichi drosglwyddo i'r Brifysgol i gwblhau eich rhaglen astudio ar un o'i champysau.

56. Yn ogystal â'r darpariaethau a restrir, mae'r Brifysgol yn cadw'r hawl i derfynu ei Contract â chi os nad ydych yn cydymffurfio â sylwedd unrhyw rwymedigaethau a nodir yn eich Cytundeb Partner-Ddarparwr.

57. **Ffioedd:** Oni bai ein bod yn eich hysbysu'n wahanol yn ysgrifenedig, chi sy'n gyfrifol am dalu unrhyw ffioedd dysgu neu ffioedd ailsefyll asesiadau yn uniongyrchol i'r Brifysgol.

58. **Cyfleusterau ac Adnoddau:** Yn ystod eich rhaglen, y Partner-Ddarparwr ac nid y Brifysgol fydd yn rhoi mynediad i ddefnyddio'r adnoddau a'r cyfleusterau a fydd yn cefnogi eich rhaglen (mewn achosion lle darperir y rhaglenni yn llwyr neu'n rhannol i ffwrdd o gampws Prifysgol Aberystwyth). Bydd eich mynediad i'r gwasanaethau hyn yn cael ei reoli gan y Cytundeb Partner-Ddarparwr.

59. **Manylebau'r Rhaglen:** Mae gwybodaeth ynglŷn â manylebau'r rhaglen sy'n berthnasol i'ch rhaglen astudio chi i'w chael ar-lein a gellir hefyd gofyn i Swyddfa Derbyn Israddedigion y Brifysgol amdanynt.

Mynediad gohiriedig

60. Os hoffech ohirio'ch mynediad i'r rhaglen tan y cyfnod derbyn academiaidd nesaf, e-bostiwch y Swyddfa Derbyn i wirio a yw hyn yn bosibl: derbyniadau@aber.ac.uk

61. Ni ellir gwarantu ceisiadau i ohirio a thrwy ofyn am ohirio, rydych yn cydnabod efallai na fydd y rhaglen yr ydych wedi gwneud cais amdani ar gael yn ystod y cyfnod derbyn academiaidd nesaf. Os byddwch yn gohirio mynediad, mae angen i chi hefyd fod yn ymwybodol y gall eich ffioedd dysgu fod yn wahanol i'r rhai a nodir yn eich Cynnig, gan fod y Brifysgol yn cadw'r hawl i gynyddu ffioedd bob blwyddyn fel y nodir uchod. Os bydd newid yn y ffioedd dysgu sy'n daladwy ar gyfer eich rhaglen, bydd y Brifysgol yn eich hysbysu cyn gynted â phosibl ac ym mhob achos, heb fod yn hwyrach na [Mehefin] y flwyddyn academiaidd cyn y flwyddyn y bydd y ffioedd yn cynyddu. Os ydych yn anfodlon â'r cynnydd yn y ffioedd, mae gennych hawl i derfynu eich Contract â'r Brifysgol.

Anableddau a Chymorth Dysgu

62. Mae'r Brifysgol wedi ymrwymo i ddarparu amgylchedd cynhwysol a hygyrch. Mae pob cynnig a wnaed yn amodol ar allu'r Brifysgol i gyflawni'r addasiadau penodol y mae eu hangen arnoch yn rhesymol i gwblhau eich rhaglen astudio.

63. Os oes gennych anabledd, bydd y Gwasanaethau Cymorth i Fyfyrwyr yn prosesu'r wybodaeth a ddarparwyd gennych am yr anabledd hwnnw ar ôl i chi gael Cynnig. Efallai y byddant yn cysylltu â chi i asesu pa addasiadau rhesymol sydd eu hangen, os o gwbl. Mae'n bosib y bydd gwybodaeth am eich anabledd yn cael ei chyfleu i staff perthnasol eraill y byddai'n rhesymol iddynt gael gwybodaeth o'r fath at ddibenion gweithredu unrhyw rai neu'r cyfan o'r addasiadau a nodwyd os byddwch yn derbyn y cynnig.

64. Rydym yn annog unigolion i ddatgelu eu hanghenion anabledd a chymorth a chymryd rhan mewn unrhyw drafodaeth neu asesiadau iechyd angenrheidiol fel sy'n ofynnol gan y Brifysgol cyn gynted â phosibl. Mae datgelu anabledd yn gynnar yn ystod y broses derbyn myfyrwyr yn golygu bod y Brifysgol yn fwy tebygol o allu trefnu cymorth cyn i unigolyn gyrraedd y Brifysgol. Pan nad yw unigolion yn datgelu eu hanghenion anabledd a chymorth yn gynnar, gall hyn arwain at oedi wrth drefnu addasiadau rhesymol ac o ganlyniad, efallai na fydd modd trefnu cymorth tan ar ôl i unigolyn gyrraedd y Brifysgol a dechrau ar eu rhaglen.

65. Efallai y bydd amgylchiadau eithriadol:

- pan y gofynnir i unigolyn ohirio eu mynediad er mwyn caniatáu amser i'r Brifysgol wneud yr addasiadau rhesymol angenrheidiol; neu
- lle nad yw'r unigolyn yn gallu ymgymryd â rhaglen am reswm sy'n gysylltiedig â'u nam neu eu cyflwr er gwaethaf yr holl addasiadau rhesymol sy'n cael eu gwneud gan y Brifysgol.

Bydd achosion o'r fath yn cael eu hasesu gan y [Gwasanaeth Anabledd] a chyfadran y rhaglen berthnasol fesul achos.

Diogelu Data

66. Wrth wneud cais i'r Brifysgol am le ar raglen a chofrestru arni, mae'n ofynnol i chi ddarparu gwybodaeth bersonol. Mae'n ofynnol hefyd i'r Brifysgol gasglu, prosesu a chadw ystod eang o wybodaeth amdanoch yn ystod eich cyfnod fel myfyriwr, a allai gynnwys data personol o natur sensitif.

67. Bydd gwybodaeth bersonol yn cael ei chadw gan y Brifysgol yn unol â thelerau ein [Polisi Diogelu Data](#) a deddfwriaeth berthnasol arall. Dylai myfyrwyr sy'n astudio gyda Partner-Ddarparwr fod yn ymwybodol y bydd eu data ymgeisydd yn cael ei rannu gyda'r Partner-Ddarparwr at ddibenion derbyn myfyrwyr. I gael rhagor o wybodaeth am sut mae'r Brifysgol yn trin eich data personol, gweler ein: [Hysbysiad Preifatrwydd Myfyrwyr : Amdanom Ni , Prifysgol Aberystwyth](#)

68. Mae'n ofynnol i'r Brifysgol gyflwyno data i'r Asiantaeth Ystadegau Addysg Uwch (HESA) bob blwyddyn i gefnogi dadansoddiadau ystadegol cenedlaethol. Wrth gofrestru fel myfyriwr gyda ni, rydych yn rhoi caniatâd i'r Brifysgol ddarparu gwybodaeth yn unol â'n rhwymedigaethau prosesu data.

69. Os oes gennych unrhyw gwestiynau neu os oes angen rhagor o fanylion arnoch am ein polisïau prosesu data a diogelu data, cysylltwch â'r adran Lywodraethu: infocompliance@aber.ac.uk

Gwybodaeth Contractiol Gyffredinol

70. Mae'r Contract rhyngoch chi a'r Brifysgol yn cynnwys y canlynol:

- yr wybodaeth a gynhwysir yn y Telerau a'r Amodau hyn;
- y telerau (gan gynnwys unrhyw amodau perthnasol) sydd wedi'u cynnwys yn y Cynnig; a'r
- polisïau a'r dogfennau y cyfeirir atynt yn Atodlen 1 sydd ynghlwm.

Sut i dderbyn ein Cynnig a phryd bydd ein Contract yn cael ei lunio

71. Bydd y Contract rhyngoch chi a'r Brifysgol yn dechrau pan fyddwch yn derbyn eich Cynnig. Os ydych yn gwneud cais drwy UCAS, gallwch dderbyn y Cynnig gan ddefnyddio UCAS Hub. Os byddwch yn gwneud cais ar hyd llwybr arall, gallwch dderbyn y Cynnig drwy ddychwelyd y ffurflen ymateb i gynnig sydd wedi'i chynnwys yn yr e-bost a gawsoch yn cynnig lle.

72. Er mwyn osgoi unrhyw amheuaeth, ar gyfer ymgeiswyr a gyflwynodd eu cais drwy UCAS, bydd Contract yn cael ei greu rhyngom pan fyddwch yn derbyn eich Cynnig hyd yn oed os byddwch yn ein dewis fel eich "dewis wrth gefn".

Sut y gellir terfynu'r Contract hwn neu ei atal

73. Bydd eich Contract yn dod i ben yn awtomatig ar y dyddiad gorffen a restrir ar eich cofnod myfyriwr, neu'n gynharach os caiff ei derfynu yn unol â darpariaethau'r Contract.

Ein hawliau i ddod â'r Contract i ben, a'r hyn sy'n digwydd os byddwn yn dod â'r Contract i ben

74. Gallwn ddod â'r Contract i ben, ar ôl rhoi rhybudd i chi, o dan yr amgylchiadau canlynol:

- Nid ydych yn bodloni unrhyw amod a nodir yn y Cynnig, (neu fod amser yn dod yn ystod eich cyfnod ar y rhaglen pan nad ydych yn bodloni'r amodau);
- Rydych yn rhoi i ni wybodaeth dwyllodrus neu wybodaeth sy'n anwir, yn anghywir, yn anghyflawn a/neu'n gamarweiniol;
- Nid ydych wedi cofrestru neu ailgofrestru o fewn yr amserlenni penodedig a roddwyd i chi cyn pob blwyddyn academiaidd;
- Nid ydych wedi cydymffurfio â sylwedd unrhyw un o'ch rhwymedigaethau a nodir yn y Contract hwn (gan gynnwys, a heb gyfyngiad, unrhyw rwymedigaeth a ddisgrifir yn y dogfennau a restrir oddi mewn);
- Ar ôl cynnal ein gweithdrefn camymddwyn academiaidd, ein gweithdrefn ddisgyblu neu brosesau eraill, mae'r Brifysgol yn penderfynu na chaniateir i chi barhau â'ch rhaglen mwyach;

- Canfyddir eich bod wedi cyflawni camymddwyn difrifol neu wedi cael eich canfod yn euog o drosedd y bernir ei bod yn effeithio ar eich gallu i fod neu i barhau i fod yn fyfyrwr Prifysgol;
- Mae eich ymddygiad, yn ein barn resymol ni, yn risg sylweddol i chi'ch hunan neu i eraill o ran iechyd, diogelwch a lles;
- Mae parhau eich cofrestriad gyda'r Brifysgol yn ein rhoi ni, neu'n bygwth ein rhoi ni, mewn sefyllfa sy'n torri unrhyw un o'n rhwymedigaethau cyfreithiol i gydymffurfio â gofynion mewnfudo'r DU neu ofynion eraill, a allai hefyd arwain at weld y Brifysgol yn tynnu nawdd Fisa Myfyrwyr yn ôl os nad ydych yn cydymffurfio â rheolau a rheoliadau fisa fel y'u diffinnir gan y Swyddfa Gartref;
- Nid ydych wedi talu eich ffioedd dysgu yn gyson gan anwybyddu negeseuon atgoffa ffurfiol;
- Er eich bod wedi cael cynnig ail-wneud blwyddyn, nid ydych yn cadarnhau eich dymuniad i ail-wneud y flwyddyn erbyn y dyddiad cau a bennwyd.

75. Os bydd y Brifysgol yn dod â'r Contract i ben am unrhyw un o'r rhesymau a nodir uchod, ni chewch eich rhyddhau'n awtomatig o'ch rhwymedigaeth i dalu'r ffioedd dysgu sy'n weddill neu ffioedd eraill sy'n ddyledus i'r Brifysgol, ac efallai y byddwch yn atebol am weddill unrhyw ffioedd sy'n daladwy, oni bai ein bod yn cytuno ar drefniant arall gyda chi. Yn ogystal, gall y canlynol fod yn berthnasol:

- Ni fyddwch bellach yn gallu bod yn bresennol yn y Brifysgol;
- Rhaid i chi ddychwelyd unrhyw eiddo sy'n perthyn i'r Brifysgol yn unol â'r cyfarwyddiadau a roddir i chi;

76. Efallai y bydd achosion pan fydd angen i'r Brifysgol eich atal rhag astudio dros dro a/neu atal y Contract hwn os ydych chi, neu os honnir eich bod, wedi torri eich rhwymedigaethau o dan y Contract hwn a Rheoliadau'r Brifysgol. Mae'r Brifysgol yn cadw'r hawl i weithredu ataliad o'r fath drwy roi rhybudd ysgrifenedig i chi.

77. Bydd unrhyw hysbysiad neu ohebiaeth arall a wneir o dan y Telerau a'r Amodau hyn yn cael ei gyfleu yn ysgrifenedig ac yn cael ei gyfeirio atoch i'r cyfeiriad e-bost neu'r cyfeiriad post diwethaf a roesoch i'r Brifysgol. Bernir bod gohebiaeth o'r fath wedi cael ei chyflwyno'n briodol os caiff ei anfon dros e-bost, ei anfon â llaw a'i gadael yn y cyfeiriad post hwnnw, neu ei hanfon drwy'r post dosbarth cyntaf i gyrraedd 48 awr ar ôl cael ei phostio i'r cyfeiriad hwnnw.

78. Hyd nes y byddwch yn cofrestru gyda ni ar ddechrau eich blwyddyn academaidd gyntaf, rhaid i chi ddiweddarau'ch manylion cyswllt gan ddefnyddio UCAS Hub (os yw'n berthnasol), neu drwy hysbysu'r Swyddfa Derbyn Myfyrwyr (e-bost: derbyn@aber.ac.uk, Ffôn: +44 (0)1970 622021). Ar ôl i chi gofrestru gyda ni, mae'n ofynnol i chi gynnal eich manylion cyswllt trwy gofnod myfyrwyr y Brifysgol.

79. Os byddwch yn torri telerau'r Contract a bod y Brifysgol yn dewis peidio â mynnu eich bod yn cyflawni unrhyw un o'ch rhwymedigaethau o dan y Contract, neu os nad ydym yn gorfodi ein hawliau yn eich erbyn, neu os byddwn yn oedi cyn gwneud hynny, nid yw'n golygu ein

bod wedi hepgor ein hawliau yn eich erbyn, nac ychwaith yn awgrymu eich bod wedi'ch eithrio rhag cydymffurfio â'r rhwymedigaethau hynny.

80. Contract rhyngoch chi a'r Brifysgol yw hwn. Ni fydd gan unrhyw berson arall unrhyw hawliau i orfodi unrhyw un o'i delerau.

81. Os bydd unrhyw orchymyn llys neu awdurdod cymwys arall yn barnu bod unrhyw ddarpariaeth o'r Contract rhyngoch chi a'r Brifysgol yn ddi-rym neu'n anorfodadwy yn ei chrynswth neu'n rhannol, bydd y Contract yn parhau i fod yn ddilys o ran y darpariaethau sydd ynddo a/neu weddill y ddarpariaeth yr effeithir arni. Bydd y Contract rhyngoch chi a'r Brifysgol yn cael ei lywodraethu a'i ddehongli yn unol â chyfreithiau Cymru a Lloegr ac mae'r partïon yn cytuno i ymostwng i awdurdodaeth llysoedd Cymru a Lloegr. Nid yw Contract y Brifysgol â'i myfyrwyr yn rhoi buddiannau trydydd parti at ddibenion Deddf Contractau (Hawliau Trydydd Partïon) 1999.

Canslo

Yr hawl i ganslo

82. Mae gennych hawl statudol i ganslo'r Contract hwn heb roi rheswm. Bydd y cyfnod canslo yn dod i ben 14 diwrnod ar ôl y dyddiad y byddwch yn derbyn eich Cynnig o le i astudio yn y Brifysgol. Er mwyn arfer eich hawl i ganslo, rhaid i chi roi gwybod i ni am eich penderfyniad i ganslo'r Contract hwn drwy ddatganiad clir (e.e. llythyr a anfonwyd drwy e-bost neu'r post). Gallwch hefyd ddefnyddio'r ffurflen ganslo enghreifftiol a ddarperir ar ddiwedd y ddogfen hon, ond nid yw'n ofynnol i chi wneud hynny.

Canslo ar ôl y cyfnod canslo statudol

83. Os byddwch yn canslo'r Contract ar ôl i'r cyfnod canslo statudol ddod i ben, ni fydd y Brifysgol yn ad-dalu'r taliadau y derbyniodd gennych yn awtomatig gan y gallech fod yn atebol i dalu rhan o'ch Ffioedd Dysgu, fel y nodir ym Mholisi Ffioedd Dysgu y Brifysgol.

84. I ganslo'r Contract ar ôl i'r cyfnod canslo statudol ddod i ben, rhaid i chi roi gwybod i'r Brifysgol am eich penderfyniad yn ysgrifenedig. Gellir gwneud hyn drwy anfon e-bost i: derbyniadau@aber.ac.uk. Neu, gallwch ddefnyddio'r ffurflen ganslo enghreifftiol a geir ar ddiwedd y ddogfen hon, ond nid oes rhaid i chi wneud hynny.

Rhaglenni sy'n dechrau o fewn y cyfnod canslo statudol

85. Os yw eich rhaglen i fod i ddechrau o fewn 14 diwrnod o'r dyddiad pan fyddwch yn derbyn Cynnig lle yn y Brifysgol (er enghraifft, os ydych wedi gwneud cais drwy'r Clirio), rydych yn cytuno'n ddatganedig y dylai'r gwasanaeth ddechrau o fewn y cyfnod canslo. Os byddwch

wedyn yn penderfynu canslo'r Contract o fewn y cyfnod canslo, efallai y byddwch yn atebol i dalu rhan o'ch Ffioedd Dysgu i dalu am y cyfnod o'r adeg y dechreuodd y Brifysgol roi gwasanaeth i chi hyd at y dyddiad canslo, fel y nodir ym Mholisi Ffioedd Dysgu'r Brifysgol.

86. Os ydych yn ymgeisydd israddedig a wnaeth gais drwy UCAS, gallwch wrthod cynnig lle drwy'r UCAS Hub. I ganslo'ch cais i Aberystwyth neu eich cais UCAS yn ei gyfanrwydd, gweler y canllawiau ar wefan UCAS: <https://www.ucas.com/undergraduate/after-you-apply/making-changes-your-application-after-you-apply>

87. Os oes gennych le cadarn diamod, mae'n rhaid i chi roi gwybod i ni am eich dymuniad i dynnu'n ôl (neu'ch rhyddhau eich hunan i'r broses Glirio). Gallwch wneud hyn drwy e-bostio'r tîm Derbyn Myfyrwyr yn derbyniadau@aber.ac.uk. Neu, gallwch ddefnyddio'r ffurflen ganslo enghreifftiol a geir ar ddiwedd y ddogfen hon, ond nid oes rhaid i chi wneud hynny.

88. Os ymgeisydd ôl-raddedig ydych chi neu fyfyrwr israddedig a wnaeth gais uniongyrchol i astudio gyda ni, rhaid i chi roi gwybod yn ysgrifenedig i'r Brifysgol am eich penderfyniad i ganslo'r contract hwn. Gellir gwneud hyn drwy anfon e-bost i: derbyniadau@aber.ac.uk. Neu, gallwch ddefnyddio'r ffurflen ganslo enghreifftiol a geir ar ddiwedd y ddogfen hon, ond nid oes rhaid i chi wneud hynny.

89. Os byddwch yn canslo o fewn y cyfnod canslo statudol o 14 diwrnod fel y nodir uchod, bydd y Brifysgol yn ad-dalu unrhyw ffioedd a dalwyd (os yw'n berthnasol) heb oedi'n amhriodol, ac ni fyddwch yn rhwym i'r Telerau a'r Amodau hyn.

90. Bydd unrhyw ad-daliad yn cael ei wneud gan ddefnyddio'r un dull o dalu â'r trafodyn cyntaf. Os gwnaed taliad gan noddwr neu weithiwr cyflogedig, bydd y Brifysgol yn rhoi'r ad-daliad i'r parti perthnasol.

Cwynion ac Apeliadau

91. Rydym wedi ymrwymo i ddarparu gweithdrefnau derbyn myfyrwyr sy'n deg ac o ansawdd uchel ar gyfer pob ymgeisydd. Rydym yn cydnabod, er hynny, y bydd adegau o bosibl pan fo ymgeisydd yn teimlo'n anfodlon â phroses derbyn myfyrwyr y Brifysgol neu â'i chanlyniadau. Os ydych yn dymuno gwneud cwyn neu apel ynglŷn ag agwedd ar wasanaeth derbyn myfyrwyr y Brifysgol, dylech edrych ar ein Polisi Cwynion ac Apeliadau Derbyn Myfyrwyr.

92. Os ydych yn dymuno gwneud cwyn ar ôl i chi gofrestru fel myfyrwr yn y Brifysgol, dylech ddilyn y drefn ar gyfer Cwynion Myfyrwyr fel y disgrifir yn ein Llawlyfr Ansawdd Academaidd yn: <https://www.aber.ac.uk/cy/academic-registry/handbook/>

93. Os ydych yn parhau i fod yn anhapus â'r canlyniad ar ôl cwblhau gweithdrefn gwyno'r Brifysgol, efallai y bydd modd i chi anfon cwyn at Swyddfa'r Dyfarnwr Annibynnol (OIA). Gellir dod o hyd i fanylion llawn ynghylch sut mae'r OIA yn gweithio yma: www.oiahe.org.uk

Atodlen 1

Dogfennau a Pholisïau y cyfeirir atynt yn y Telerau a'r Amodau hyn:

Dogfen Polisi	Lle gellir cael gafael ar y ddogfen hon
Llawlyfrau Adrannol y Brifysgol	https://www.aber.ac.uk/cy/about-us/departments-faculties/
Rheolau a Rheoliadau'r Brifysgol a Gwybodaeth i Fyfyrwyr, gan gynnwys: · Sicrwydd Ansawdd yn Aberystwyth · Datblygu ac Adolygu · Asesu Cynlluniau trwy Gwrs · Confensiynau Arholiadau · Arholi Allanol · Cymorth i Fyfyrwyr a Chynrychiolaeth Myfyrwyr · Graddau Ymchwil · Darpariaeth Gydweithredol · Dysgu ac Addysgu · Apeliadau Academiaidd · Cwynion Myfyrwyr	https://www.aber.ac.uk/cy/academic-registry/handbook/

· <u>Disgyblu Myfyrwyr</u> · <u>Addasrwydd i Ymarfer</u> · <u>Adolygiad Terfynol</u>	
Polisi'r Brifysgol ar Ymddygiad Academaidd Annerbyniol	https://www.aber.ac.uk/cy/academic-registry/handbook/regulations/
Rheoliadau ynghylch Eiddo Deallusol a Masnacheiddio	https://www.aber.ac.uk/cy/rbi/strategies-and-policies/
Cydraddoldeb ac Amrywioldeb	https://www.aber.ac.uk/cy/equality/
Y Siarter, Ystatudau ac Ordinhadau'r Brifysgol	https://www.aber.ac.uk/cy/about-us/corporate-information/governance/about-governance/
Rheoliadau ffioedd a chyllid ychwanegol y Brifysgol	https://www.aber.ac.uk/cy/study-with-us/fees/undergrad/
Rheolau ynglŷn â defnyddio cyfleusterau'r llyfrgell	https://www.aber.ac.uk/cy/is/library-services/

Rheoliadau, polisïau a chanllawiau ynghylch defnyddio TG a chyfleusterau rhwydwaith	https://www.aber.ac.uk/cy/is/regulations/
Gwybodaeth am Bartneriaethau Academaidd	https://www.aber.ac.uk/cy/academic-partnerships/staff-info/
Rhagor o wybodaeth i fyfyrwyr	https://www.aber.ac.uk/cy/academic-registry/handbook/regulations/student-info/

Ffurflen Ganslo Enghreifftiol

Enw llawn:
Dyddiad Geni:

Rhif Cais:
Cod y Rhaglen:

Yr wyf trwy hyn yn rhoi rhybudd fy mod yn dymuno canslo fy nghytundeb â Phrifysgol Aberystwyth i astudio rhaglen sy'n dechrau yn 2026.

Gofynnaf i chi (dewiswch fel y bo'n briodol):

- Tynnu fy nghynnig yn ôl neu ganslo fy Nghontract
- Fy rhyddhau i broses glirio UCAS